

山右石刻叢編

山右石刻叢編卷十七

賜進士出身龍鳳縣尉有司御史巡撫山西兼管提督鹽政印務新制太原城守尉天明胡聘之所

宋

眞澤廟牒

碑高四尺二寸五分廣二尺三寸八分四截上截四行二截六行三截十行四截九行行書今在壺關縣

尚書省牒隆德府壺關縣真澤廟

禮部狀承都省付下河東路轉運司奏隆德府壺關縣樂女二仙廟祈求感應乞特賜封加勅額爵號尋下太常寺勘會今據本寺狀檢准令節文諸神祠應旌封者先賜額合取自朝廷指揮

牒奉

勅宜賜真澤廟為額牒至淮

勅故牒

崇寧四年八月十二日牒

中大夫守右丞鄧

押

太中大夫守左丞何

押

司空左僕射

押

勅隆德府真澤廟樂氏女得道者以善貸為心體仁者以博
施為德既陰功之昭著宜顯號之褒崇惟神虛緣保真名標
乎僊籍愛民利物澤被于一方人用安寧歲無水旱特頒渙
渥錫以徽口式彰茂烈之崇俯慰黎元之望尚祈福蔭永膺
此邦可特封

冲惠真人

冲淑真人

奉

敕如右符到奉行

政和元年四月十一日口

按碑前刻牒文後刻勅文

牒賜廟額勅賜封號也

牒爲崇甯四年八

月十二日下所列官守右丞鄧者鄧洵武守左丞何者何
執中司空左僕射者蔡京也宋史本紀崇甯三年九月乙
亥刑部尚書鄧洵武爲尚書右丞四年二月甲寅吏部尚
書何執中爲尚書左丞大觀元年正月壬子執中遷中書
侍郎洵武遷左丞又崇甯二年正月丁未蔡京爲尚書左
僕射兼門下侍郎三年五月己卯京守司空五年二月丙
寅京罷以時考之皆與碑合又勅有隆德府云云宋史本
紀元符三年十一月己卯改昭德軍爲隆德軍崇甯三年

十一月丙申升隆德軍爲府地理志隆德府本潞州崇甯三年改爲府仍還昭德舊節以徽宗自昭德軍節度使卽位也勅頒政和元年在崇甯三年後故不曰潞州而曰隆德府亦與史合

惠潤和尚塔銘

石連額高二尺五寸廣二尺二十六行行三十字
額題戒師潤公塔銘六字均正書今在芮城縣

□□芮城縣壽聖寺戒師和尚潤公塔銘有序

和尚名惠潤生于太原之平晉父劉成母畢氏幼知其爲法器逮年二十遣卽其邑崇聖寺礼僧崇海爲師當嘉祐六年正月也改治平之四年會

紹天皇帝誕節試天下僧尼童而師以誦經得度以是年三月祝髮且從其府之資聖院式壇授戒自是檢身持律以不見道不足以償出家之本意迺趨西都龍門就真戒大師悟

真而學焉由熙甯庚戌終丙辰更七春秋而盡傳其業所通
經論若唯識之秘言法華之妙旨靡不該究為衆所推蓋其
警悟開敏精進勇力如此蒲之普救知名寺也師始往升座
講說後學之徒聽者以百數復從其郡開元寺法師因公授
大乘戒是為戒師暨元豐初芮僧文智與邑之信善士姚拯
輩詣師恭欽作礼懇請於此住持時是院一圖墟故寺基爾
師至而化衆檀越相與經營締構餘三十年凡今之殿塔鐘
閣門廩厨庖法堂僧室脩廊邃宇雕鏤繪塑金碧焜耀窮壯
極麗者皆師之所為也所度弟子智深而降凡一十七人迺
若游習京師克嗣院事則有衣紫僧智廣口開演經論傳師
之學則有座主僧智雅者其餘亦皆醇古幹力恪奉師訓見
者知其為潤公門人也師以大觀四年歲庚寅正月丁巳初

無疾恙召群弟子屬以後事右脇而化壽六十九臘四十四
逮政和改元夏四月智廣與其法眷弟共作贊室以厝其
真軀舉事之日邑之衆大和會至百千人咸往觀焉噫潤公
起身民宗暨為僧能以行業自顯蓋所謂豪傑之士矣生而
化其人作衆難事成若反掌歿猶使人忻慕感悅而不忘也
願豈獨能以因果禍福之說撼其心哉亦必有不言而誠以
得諸人者邑學尹稱孝聞其風而悅之因為論次而書其事
且系以銘云維是壽聖昔為法昌造自旣廢恢焉未遑爰有
大士來從冀方增庠易陋崇起道場成已厭離寂歸何鄉碧
潭秋月俄晦其光鴈級突兀澄觀云亡猊座凝塵生公一堂
遺軀示幻不火而藏龕置贊室如植寶幢至者作礼為道津
梁凡境中人欽信毋忘

有宋政和辛卯中元日門人智演智光智盛智輪智寶智
浩智明智圓智琳智雅智文智廣善琮暨師孫師贊師敏
智岳師計師海師真智隱智巖師正海雲共建時恩辯瓊
深已化

按芮城縣志壽聖寺在縣城東北里餘內有浮圖十三級
宋元豐六年建據是碑有云元豐初芮僧文智詣師作禮
懇請於此住持經營締構餘三十年與志所述相合自元
豐初至政和辛卯適三十許年故銘云爾神宗生於慶厯
八年即位後以生日爲同天節茲碑所云紹天皇帝者乃
舉尊諡言東都事略神宗本紀紹聖二年加上尊諡曰紹
天法古運德建功欽仁皇帝崇甯三年再加上尊諡曰紹
天法古運德建功英文烈武欽仁聖孝皇帝政和三年改

上尊號曰體元顯道帝德王功英文烈武欽仁壽孝皇帝
是碑作於政和辛卯中元日辛卯爲政和元年在未改體
元諡以前故仍舉紹天之號畢沅續通鑑於崇甯三年十
一月辛巳卽書改上神宗諡曰體元顯道帝德王功英文
烈武欽仁壽孝皇帝而謂東都事略誤以紹聖二年所上
之諡移於是年今碑作於政和辛卯上距崇甯三年已歷
七年之多使當時已改諡體元不應仍舉紹天舊號王偁
以本朝人述祖宗尊諡豈宜錯謬乃爾恐事略不誤而史
轉誤矣庚戌熙甯三年丙辰則九年也又按縣志載有姚
宗道所撰塔寺創修法堂記有云出郭東北僅數百步有
古寺遺基多神異好奇者鑿之得舍利一器因於元所造
塔創室堂請法師惠潤來講戒行經論衆皆欽信僧俗乞

留共主院事善士姚拯選募妙匠築土成基始元豐辛酉
迄壬戌法堂成潤師來求予文所謂潤師卽此潤公所謂
塔寺卽此碑所云殿塔鐘閣者然則潤公蓋必彼時精習
涅槃者故羣推服若是歟

喬澤廟碑

碑連額高四尺七寸六分廣二尺二寸七分二十七行行
四十五字正書額題四字分書今在翼城縣南絳高山
□□翔臯山喬澤廟額記

宣德郎知絳州翼城縣管勾勸農公事專切管勾學事田
灝撰并題額

將仕郎絳州翼城縣主簿專切管勾學事龐長孺書

距邑數十里群山迴抱獨闕其西據高望之如玦然其亘於
東南峯嶺奇秀崢嶸嶺鬱直起千仞干霄柱空突然而欲飛

者曰翔臯也其下有泉混混數脉一寫萬斛流波跳沫若驟
若馳衍溢灌溉利盡一川蓋翔臯之水也夫以山高口長貫
參之墟為晉之望含畜靈氣於融結之先朝為雲霓暮為風
雨茫乎不可測其變化謂漠然無神物以口之則可乎負山
之趾枕泉之首地形隱嶙岡阜前起林構蒙密煙霞蔽虧有
廟奕奕像貌甚口蓋 翔臯之神也神有廟於境莫詳其所
自由唐大曆二年而後碑刻始著其載腦臙之迹卓絕詭異
皎皎照人耳目一方之人所以祈嚮甚篤凡歲將有暵溢之
變必群詣而禱焉禱不旋踵隨輒以應故翼民每恃之以為
亡懼及圖報謝益虔不怠牲牢之饋簫鼓之聲駿奔狎至然
自始距今垂數千百年曾未有以神之靈迹暴于上以求領
于祠官者大觀四年邑宰王君邁始合邑人之願撮神前後

響應之實以聞于郡郡以其事列于外臺請于 朝廷時

上方興禮樂致太平懷柔百神無文咸秩凡群祀之在方國
初未有封爵者咸加賜廟額以賁寵之況所謂山川之神尤
有功德于民者耶遂

可其奏以明年六月六日

賜名曰喬澤之廟於時

□君去邑而灝承乏迺翌日率僚佐具牲幣之奠以告而揭
賜額於廟之門頃之耆耄士女填溢阡陌仰瞻咨嗟願益新
廟宇以侈 天子之賜俄而有投金錢運瓦甓施藻

繪者響答景隨若恐居後是日也泉石草木恍若動色先是
前一日天宇鮮澄有白雲數十片團團起于東山之麓狀如
連珠並山相屬而南聚于祠上久之不散灝時與客登縣居
東軒而望心獨愛之然不以為異也越明日而廟額自 □

○至豈 渙汗之命神固前知雲車洩洩來顧來享將受職
天子而不敢後歟吁是可異也是歲春方憫雨二
麥將槁已而一霈十日更以稔聞迄于秋成五穀滋熟棗復
倍入戶有餘糧或者謂神陰為之報則非耶於是邑人相與
伐石攻木○記顯既○書其實因為迎送神詩二章繫于後
俾民之來視者得以習而○焉其詞曰

山翔臯兮奠參墟 ○○靈兮○舊都 迄昭代兮陳祀
典 揭廟榜兮耀金鋪 駿奔走兮翼民喜 進肴蒸兮
藉蘭茝 巫○兮舞踑蹌 若有憑兮神戾止 神之
來兮風肅然 高冠長佩兮都且鮮 紛前導兮絳節
儼徐○兮雲輶 祝史踞兮獻絲 神有語兮潛授 承
嘉惠兮不忘 報 天子兮萬壽其一山之下兮發重泉

資灌溉兮萬夫田 功施物兮超以邈 俗報祀兮嚴且
蠲 剗羊刺豕兮禱豐歲 桂酒清泠兮神□醉 巫緩
節兮歌少停 迴祥飈兮神返旆 神之去兮窈畫陰
煙漠漠兮暮山深 聞人悄兮衆籟息 □溪水兮留清
音 悅不知兮處所 陰來調兮風雨 其自今兮爾報
歲歲登兮禾黍_{其二}
政和元年十月初二日將仕郎絳州翼城縣尉專切管句
學事康經天立石

亢忠立刊

按碑前題知翼城縣事兼管句學事田灝撰并題額將仕
郎絳州翼城縣主簿專切管句學事龐長孺書灝見翼城
志政和元年任知縣長孺階將仕郎宋史本紀崇甯二年

十月辛丑改吏部選人自承直郎至將仕郎七階文獻通考宋崇甯初以將仕郎換軍巡判官司理司法簿尉碑以賜喬澤廟額而作縣志喬澤廟在翔皋山上古柏森茂有泉乃翔山灤水之神宋大觀四年邑令王通以神之響應聞外臺請於朝賜額曰喬澤之廟政和四年邑令田灝重修有記即此碑碑所云翔皋山在邑東南十五里水經注澮水東出翔高山唐書地理志翼城有翔皋錢坊縣志邑令王通今撮本作邑宰王君邈高繼嵩碑題王邈撰當即此人其曰上方興禮樂云云者宋史本紀崇甯四年八月辛卯賜新樂名大晟大觀元年正月庚子置議禮局皆其證又云凡羣祀之未有封爵者咸加賜廟額如平定軍石資神廟賜額豐濟王在崇甯三年見金靈贍廟碑鹽池澮

泉神封普濟公在大觀二年見今運城志及元池神廟碑
其他猶夥不具錄此皆可與碑文參證者末題政和元年
十月二日將仕郎縣尉康立石無四年重修事縣志誤又
按碑王君以大觀四年請賜廟額明年六月六日賜名時
王君已去而田灝代之故為撰記非重修也碑見通志金
石記

孫沖詩碣

共四石高二尺三寸第一石廣七寸四分二行行十字第
二石廣一尺一寸三分三行行五字至十二字不等第三
石廣一尺八分三行行七八字不等第四石高一尺一寸
五分廣六寸七分大小四行行字不等正書左行今在隰
州

峨峨溪畔石迢迢石邊路寄言名利徒清賢誠足慕

天聖九年八月二十五日河東轉運使尚書兵部郎中直

史館孫冲題

長孫郊社齋郎京書次孫校書郎永捧硯

金城趙君同至此 隰州薛興刻

本州□□能刊石

政和二年四月十六日□置水□

本州安聖寺前知



按碑題天聖九年八月二十五日河東轉運使尙書兵部
郎中直史館孫冲題長孫郊社齋郎京書次孫校書郎永
捧硯金城趙君同至此宋史孫冲傳字升伯趙州平棘人
累遷刑部郎中歷湖北河東轉運使入判登聞鼓院改兵
部郎中直史館知河中府徙潞州復爲河東轉運使遷太
常少卿擢右諫議大夫復知潞州按碑題兵部郎中直史

館正冲復爲河東轉運時孫永有傳官至吏部尚書資政
殿學士

傳言永十歲而孤冲列爲子行蔭將作監主簿不言爲校書郎此碑明言次孫校書郎永與史不合

連理木頌

石高一尺五寸廣三尺四寸五分三十八行行二十字正書今在奇嵐州

嵐州連理木頌

并序

成周之盛有異畝同穎之禾西漢之興得衆支內附之木經
史具載號爲殊祥皆所以明至德之應也政和三年冬十月
适受 命剖符獲守茲土幸承 聖化吏奉法民樂耕盜息
訟稀風雨時若雖途謠里諺莫不歌詠 太平之美願才術
何所施但恭行不擾而已越明年暮春衆木方華有杏連理
見於西園不知歲月之幾疑若有待而顯者詢諸士庶皆莫
能道視其實凡一本並柯中分上合直榦如杠偃葉如蓋華

如紅酥實如翠旒翦然特異雖然前世所傳其事往矣今

我宋休明之盛實使人親見之也仰惟 聖君在宥天下啓

迪 鴻休明靈感應動植涵濡环符異貺比比時見廼者洛

有蟾芝湖出神器石呈堯瑞圭顯禹功龍興碼瑙太和水晶

南雄之楓麻城之鶴鄭山之菌石城之芝凡都邑之獻于

大庭者歲臻月益至若 秘殿瓊苑祥應殊常連理七木相

繼發見紅蕖並秀碧丹萃舒竹生黃蘗槐貫橫枝凡此不可

勝紀直史者書美不暇嗚呼盛矣惟茲遠邦與承 帝力此

木之出彰我 皇德蓋亦知其時焉耳然則和氣薰蒸橫流

旁浹較其懿瑞未容前古之可比矧 今禮備樂成洋溢中

外如前日極祀 昊穹天神垂象 元子冠成曦馭翔暉此

又曠世所未聞者也昭顯 對天之閔休揚厲無前之偉績

升中太室臧玉塗金不朽之傳正在 今日顧斯靈貺安
敢匿乎圖上 南宮況存 典制既而闢地構亭刊石以紀
謹拜手稽首而形于頌頌曰

維杏之華 維春之陽 百卉競麗 各集其芳 超越衆
美 獨呈其祥 旁枝特出 上協中央 其質婉婉 其
葉煌煌 昔聞治古 周嗣于商 杳見靈物 為祉為昌
恭惟 神宋 奄有四方 北截幽薊 西通夜郎 行人
萬里 冠古 一王 天符密契 神珎發揚 紫芝丹菌
唳鶴鳴凰 卿雲粲粲 瑞石琅琅 七木並梗 一花
重房 道化神格 物阜民康 傳于秘典 發乎 雲章
告成于帝 喬嵩之傍 穆穆天子 德並九皇 輯是
懿瑞 大邦之光 永惟封植 億壽无疆

政和四年六月朔武經郎兼閤門通事舍人口發遣軍州事劉适撰并書

按碑云政和三年冬十月适受命剖符獲守茲土明年暮春衆木方華有杏連理見於西圃又有圖上南宮云云按宋政宣間君臣崇尚符瑞舉國若狂丹陽集二十四卷江陰葛勝仲撰孫鴻慶序略曰公中宏詞第一時天子輯瑞應蒐講彌文報禮上下四方以符瑞來告者不可勝數大臣表賀皆出公手此碑云圖上南宮則亦在來告之列碑有禮備樂成洋溢中外前日禋祀昊天天神垂象元子冠成曦馭翔暉云云按宋史本紀崇甯四年八月辛卯賜新樂曰大展政和三年四月丙戌班五禮新儀五月己酉班新燕樂十一月癸未祀圓丘乙酉以天神降詔告在位作

天眞降臨示現記四年二月癸酉長子桓冠皆其證也和政

四年癸丑閏大碑末題政和四年六月朔武經郎兼閤門學辟雍雅樂

通事舍人權發遣軍州事劉适撰并書校宋邊郡例以武臣知州資淺者為權發遣嵐為邊郡例用武臣据碑适以政和三年十月知嵐可為考晉故者之助

梵業寺勅額碑

碑連額高三尺八寸廣一尺七寸七分三截上截十四行中截十二行下載十六行行字均不等額題六字均正書今在平遙縣

中書門下 牒汾州

汾州奏准 勅勘會到下項未有名額係帳

存留寺院共八十四所乞賜勅額候

勅旨內平遙縣西泉村靜觀寺宣賜梵業寺

牒奉

勅如前宜令本州續

勅黃降付逐寺院依今來

勅命所定名額牒至准

勅故牒

嘉祐八年六月二十三日牒

戶部侍郎參知政事趙

戶部侍郎參知政事 陽

中書侍郎兼禮部尚書平章事曾

門下侍郎兼兵部尚書平章事韓

汾州 帖

准 勅一道者

右具如前今錄

勅黃帖平遙縣西泉村梵業寺依今來

勅命所定名額不得有違

嘉祐八年七月三十日

帖

守司戶參軍張

守錄事參軍杜

權知團練推官李

權知團練判官傅

尚書都官員外郎通判軍州事劉

光祿少卿知軍州事向

梵業寺住持 僧圓吉

伏覲當寺

勅額藏之并深常慮帑翰匪堅唯恐歲月湮墜遂集里人僉議咸皆異口同音乃命良工模諸寶石俾夫

皇恩永布

睿澤遐新文燦日星傳之不朽時大宋政和四年甲午歲十月二十三日謹記崇賢郭夷甸書

門人住持化緣修造僧法珣

從事郎行平遙縣尉周□

將仕郎平遙縣掌□田輦

承節郎監平遙縣酒稅馬元輔

通仕郎平遙縣丞張彥卿

奉議郎知平遙縣管勾勸農事侯天贊

當縣郭保 男盛 次男智珣製并刊字

校碑分三段首刻中書門下牒汾州次刻汾州帖又次刻
梵業寺僧記平遙縣志梵業寺在縣南西泉村二十里舊
名靜觀寺宋嘉祐八年勅賜今名有碑卽指此碑又縣志
謂宋嘉祐八年百福寺牒尚書門下奉勅賜額中有戶部
侍郎參知政事趙戶部侍郎參知政事歐陽中書侍郎兼
禮部尚書平章事曾門下侍郎兼兵部尚書平章事韓石
在超山寺與此牒當同時下牒所列諸人與史職官表參
校趙卽趙槩歐陽卽歐陽修曾卽曾公亮韓卽韓琦但職
官表趙槩以嘉祐七年三月除參知政事歐陽修以六年
四月除參知政事而均未加戶部侍郎曾公亮以六年閏
八月加同平章事韓琦以三年六月加同平章事而亦未
兼中書門下兩侍郎按之通鑑長編則八年夏四月甲申

宰相韓琦加門下侍郎兼兵部尚書曾公亮加中書侍郎
兼禮部尚書參知政事歐陽修趙槩並加戶部侍郎悉與
碑合汾州帖有守司戶參軍張守錄事參軍杜權知團練
推官李權知團練判官傅尚書都官員外郎通判軍州事
劉光祿少卿知軍州事向寺僧記有崇賢郭夷甸書從事
郎行平遙縣尉周關將仕郎平遙縣掌關田輦承節郎監
平遙縣酒稅馬元輔通仕郎平遙縣丞張彥卿奉議郎知
平遙縣管句勸農事侯天覺縣志均無可補其闕

紫清觀牒

石高三尺五寸六分廣二尺八分五行行字不等行
書小字六行行二十一字正書今在芮城縣西門外

尚書省牒保平軍紫清觀

牒奉

勅宜賜 紫清觀為額牒至准

勅故牒

政和五年八月八日牒

光祿大夫右丞薛

押

正議大夫守左丞侯

押

少師太宰

太師魯國公

押

保平軍奏本州界芮城縣有侯真人降生臺在縣城西臺
上有唐咸通中所立碑云河中府永樂縣道靜院道士姓
侯名道華大中五年上昇今據芮城縣狀按圖經照得實
載唐時昇天侯真人降生臺修到觀宇舍屋三十餘間塑
像三清侍從真人等乞賜名額州司契勘委是載在圖經

緣未有觀額伏候

勅旨

○**寧**宮道士臣張道先摹刊

知觀事道士臣高岳元立石

按碑錄牒文云保平軍奏本州芮城縣有侯真人降生臺

宋史地理志永興軍路陝州大都督府陝郡太平興國初

改保平軍

本保義避
太宗諱

改縣七芮城中下侯道華見唐會要芮

城縣志侯真人降生臺在城西紫清觀側咸通三年邑令

高元謩築臺刻石卽此牒所云唐咸通中碑又此碑以勅

賜紫清為額給牒而立末書政和五年八月八日牒所列

銜有光祿大夫右丞薛正議大夫守左丞侯少師太宰太

師魯國公以宋史考之本紀大觀四年八月乙亥侯蒙為

左丞六年十一月戊申蒙遷中書侍郎政和三年四月己酉薛昂爲右丞六年十一月戊申遷左丞大觀三年六月辛巳何執中爲尚書左僕射兼門下侍郎政和二年九月壬午改左僕射爲太宰十一月執中爲少傅太宰三年八月丙子執中爲少師六年正月辛未致仕政和二年二月蔡京復太師致仕五月己巳京落致仕三日一至都堂議事二年十一月辛巳京進封魯國公然則此牒所列之右丞薛者薛昂左丞侯者侯蒙少師太宰爲何執中太師魯國公蔡京也紫清觀明併入眞常宮亦見芮城志碑見通志金石記

勅賜嘉澗公記

碑已殘裂就搨本計之連額高三尺八寸九分廣一尺七寸九分十三行下闕行字難稽額題六字均正書今在陽

城縣南
七十里

政和六年四月一日

勅中書省尚書省三月二十九日奉聖旨析城山商湯廟可
特賜嘉潤神誠應侯可特封嘉潤公奉

勅澤州陽城縣析城山山神朕天覆萬物與雨

穡事寔懼言念山湯嘗有禱洗曰公俾民

貽事可

勅如右牒到奉

勅下廣淵廟四月三日卯時禮部施行

按碑刻政和六年四月一日敕中書省尚書省奉聖旨析

城山商湯廟可特賜嘉潤神誠應侯可特封嘉潤公云

云縣志成湯廟在析城山上宋熙甯九年河東旱通判王

任禱雨獲應上言其事詔封山神爲誠應侯宣和六年以
廣淵之廟題榜湯祠加封析城山神嘉潤公敕書立石安
廟壁上古蹟有宋政和六年封析城山神敕書廟碑今通
志金石記据古蹟訂爲政和六年以今搨本證之良是宋
制中書取旨尚書奉行此碑云中書尚書奉聖旨者可以
見當時之制溫公集有三省合班奏事劄子末題四月三
日卯時禮部施行宋禮部隸尚書省故也

趙和墓志

碑連額高一尺七寸廣一尺二寸八分二十四行行二十
六字正書額題宋故趙公墓銘六字篆書今在汾陽縣

宋故趙公墓誌銘并序

河東裴公輔撰并書及篆

公諱和字子禮姓趙氏鄆州洛川縣龍門鄉中趙里人也高

曾而上罹五季之亂家譜靡記太父諱父士元皆隱德不仕
世以服田力穡為業冠鄉戶之甲 公年未壯室慨然有四
方之志一日謂昆仲曰勤勞稼穡非我志也由是悉付其產
於宗屬奮袂大河之東寓迹汾水之上樂其人物蕃庶井邑
駢密貿易經營得遂其志因而家焉自秦抵晉謹身節用不
十數年復豫豪籍之右 公善治家事舉措有法於長上致
敬於朋友篤信閭里之人無賢不肖皆欽慕之晚節好恬淡
喜釋氏貧乏者哀矜之又從而振貸之非心懷惻隱孰能至
於是與於戲弼留寢疾薤露俄晞紹聖三年正月十九日終
於家春秋六十有一識者聞之莫不相吊而哭之慟其配曰
孫氏貞規克順柔德惟明禮終婦儀家叶母訓二男長曰潤
歷江淮京洛為富商大賈娶梁氏次曰津克承父志清慎守

成娶文氏一女適清河張貴繼公而化孫男三長曰杲次曰棠次曰柔孫女二長適豪族張洪次幼在室卜用政和六年八月丙寅之吉葬于汾州西河縣大夏鄉橋南里先期子津請銘以誌幽隧義不可免直紀行事系之以銘曰

天水趙公 秦川誕育 治本於農 樹藝五穀 棄其

田疇 委諸宗族 經營四方 抵汾之曲 未十餘春

堂構復新 倉箱浩浩 子孫訖訖 拯濟周旋 樂

善隨緣 康寧富壽 保終天年 古云孝行 生事死

葬 追遠慎終 誌其榮口

地一段南北長貳伯伍拾玖步闊伍拾捌步內郝宣德
計地伍拾玖畝捌分伍厘東至郝節推西至謝大姑南
北至武弁內自己圍封占貳畝半 張天民刊

按通志金石記石於同治間爲汾水衝出故自來金石家皆未著錄碑題河東裴公輔撰并書碑言公諱和鄆州洛川人年未壯付田產於宗屬貿易於汾不數年預豪籍則和固以商起家者以紹聖三年正月十九日終政和六年八月丙寅葬西河縣橋南里和以鄆人殖產富厚不葬鄆而葬汾則已遷籍爲汾人矣碑云因而家焉者可證志文簡潔敘述有法其曰洛川縣龍門鄉中趙里西河縣大夏鄉橋南里皆可爲考宋世地名者之助而以鄉統里亦見宋世之制碑見通志金石記

紫園三十六景詩代續志

碑從裝本錄出尺寸行數無稽今在壺關縣

□□□□壁府休光常照實沉天晉人□首王靈及更伏

壺關令尹傳咸平御書閣神媧補春天道石此焉在珪璧升
帝壇圻壙委卿佩□掖夜按藍□眉曉句黛秋□繡金□雲
表承沈淋□□峯陽逐初升八極車飛光猶帶赤城雨後山
英固□葵心在不許羣峰敢□□迎暘峰解天為黨茲山亦
壯哉幙良凌迤邐□□□

按壺關志紫團山三十六景詩宋政和中王宋字輔道者
所作以應邑大夫之請者也原刻十二石卽其手稿書法
神奇可愛始以揭本累僧埋於山麓後人蹤跡掘之止得
其八嵌慈雲寺壁間後又止存其四國朝順治中縣令崇
德朱公移置學宮蓋是石之不全已久而珍重愛惜之者
後先一轍也余始至壺學卽訪求之聞止有一石亦無覓
處今年秋忽以無意得之拂拭之餘如獲珍寶竊謂此石

既置學宮當垂永久乃僅百有餘年又復漸就湮沒豈愛
與不愛人情固有不同耶抑此石之顛晦亦有數存其間
耶余不忍既得復失又望後人因其一而更留意於其三
也因葺之齋舍壁間並志其顛末如此

乾隆辛亥中秋解梁呂天培識

邑人王遐齡書

按潞安府志王輔道紫團詩碣自跋云紫團勝賞間之舊
矣壺關大夫俾圖作記欲得余詩余時在管城錦繡潭上
自食至晡三十六景賦之徧點竄一二字耳因以草卷寄
時政和六年九月既望乙巳輔道書郡志云輔道書字神
奇原刻十二石亦以搨本累僧碎之埋於山麓後人蹤跡
掘之止得八石嵌於慈雲寺壁間後止存四石壺關續志

據府志則順治中知縣朱輔移置學宮時尚存四石輔嘗
修縣志所錄之十六首卽四石也而疊蒼峯五古完好無
闕竟不錄及何耶石不知何時又亡乾隆辛亥訓導呂天
培搜訪僅獲一石因嵌之文昌祠壁又按宋史王厚傳子
宋字輔道好學工詞章登第至校書郎忽若有所覩遂感
心疾唯好延道流談丹砂神仙事得鄭州書生託左道自
言天神可祈而下下則聲容與人接因習行其術纔能什
七八須兩人共爲乃驗外間謠傳浸淫徹禁庭徽宗方崇
道教林靈素自度技不如願與之游拒弗許戶部尚書劉
昺案外兄也久以爭進絕還往神降案使因昺以達案
言其故神曰第往與之言汝某年月日在蔡京後堂談某
事有之否昺驚駭汗洽不能對蓋所言皆陰中傷人者乃

言之帝卽召案風儀既高又善談論應對合上指帝大喜
約某日卽內殿致天神靈素求與共事又弗許或謂靈素
但勿令鄭書生偕案當立敗卽白帝曰案父兄昔在西邊
密與夏人謀反國遲至尊候神且圖不軌帝疑焉及是日
案與書生至東華門靈素戒閭獨聽案入帝齋潔敬待越
三夕無所聞乃下案大理獄成棄市校案始末如此後人
以神奇詫之過矣碑見通志金石記

潞公軒記

石高三尺七寸廣九寸記文一行二十四字
旁題二行行四十六字均正書今在翼城縣

天聖六年三月廿一日新修河亭記大理評事知縣文彥博
書

太師潞國文公昔宰翼城修河亭於聽事之後親書歲月

榜於屋極後人更以國爵名軒以推之天聖六年歲在
戊辰越政和七年丁酉九九年矣閱日雖久真蹟尚完
謹勒于石以傳不朽三月二十一日承議郎知縣事李元
孺書

按碑題天聖六年三月二十一日新修河亭記大理評事
知縣文彥博書按宋史文彥博傳及進士第知翼城縣通
判絳州無年月以此碑考之則以天聖六年知翼城可補
史闕翼城縣志宋路公軒記碑卽河亭宣和中縣令李元
孺記按碑題政和七年非宣和路公治翼修河亭於廳事之後親書歲
月榜於屋極後更以國爵名軒以歷推之天聖六年戊辰
越政和七年丁酉凡九十年矣閱歲雖多其蹟尚完謹勒
于石以傳不朽今搨本多漫漶據縣志補碑末題三月二

十一日承議郎知縣事李元孺書縣志職官宋知縣一員
李元孺政和七年以承議郎任與碑合又記文今揭本首
句爲太師潞國文公校縣志多四字昔宰翼城不作治翼
後字下有人字六年下有歲在二字閱歲作閏日其蹟作
眞蹟均當以碑爲正北盟會編河東逢虜記靖康元年十
月二十八日絳州自亂遺史曰是日軍亂守臣李元孺棄
城走政和元年元孺嘗知壺關見眞澤碑

修武安王廟記

碑連額高三尺九寸廣一尺七寸八分二十
一行行四十三字正書今在聞喜縣西關

解州聞喜縣新修武安王廟記

穎川阮升卿撰

汴陽呂唐叟書

江夏李師哲篆額

歷世為將者奮身決戰視死如生苟臨利害不顧名節此匹夫之勇往往皆是也及其風塵畢起群孽爭馳忠以報上勇以戡亂雖千萬中蓋難其人矣嘗閱諸信史載其勳烈較其成敗固有優劣之異及至臨大節而不可奪輝耀今古捨忠勇軼群孰得而跂及惟王以義從昭烈帝與飛為禦侮恩顧雖厚未嘗鮮禮誓以共死以事先主可謂忠矣至於率眾攻曹水潰七軍斬魏諸將群盜畏服威震華夏曹公避銳可謂勇矣觀其曹公感義而堅不能久留雖圖報曹公而心於先主終始不變卓然過人何異夫鑢邪之劍至剛而不撓松栢之幹歲寒而不易其遺風餘烈凜凜乎如秋霜之嚴也王解人也去古浸遠神靈不替故能陰相我

朝廷屢有顯烈由是累加封爵以荅 神休聞喜解之支

邑也中條稷山南北相望土廣民饒最為繁劇崇寧初二寇
擾民當職者深以為患弓級董政實領諸眾僅二十餘年盜
賊畏懼挺然建議曰我輩以擒捕為職勦力用命匪神佑於
其間不能屢捷故臨出入常禱于 王無不獲功信乎

王之德生而忠勇其名不隕降靈在人應於不測故上可
以佑 國家遠可以鎮邊境迺可以保鄉閭昭然鑒口

若在左右何其一鄉之人不能建立廟貞尊加嚴事歸報

神德於是與同列口立郭安協力營幹因有異口遂卜縣
城之西擇為廟所環垣周圍計地三畝至大觀三載孟秋望
日殿廡方就離軒之前崇以為門堞乾位之隅敞以為花圃
植木之繁以聚清陰面山之峯以增遠目故歲時鄉社之人

得以陳俎豆脩樂舞于庭逮至政和七年會 令佐賢明

訟簡刑清政修廢舉命使立石樂其功之罔墜噫嘗謂

王之行事其忠節勇功炳若丹青鄉人之所詳聞今略述其
大槩俾忠義之士激昂奮勵以報 朝廷豈不偉歟里人從

政郎郎洪嘉其誠意相屬為文以紀其實

時政和七年九月望日記

迪功郎縣尉兼管勾學事專切管勾教閱保甲吳翊

迪功郎主簿兼權縣丞呂翼

承信郎監酒稅杜安

承信郎監酒稅田輔

秉義郎權巡檢來擇

宣義郎知解州聞喜縣管勾勸農公事兼兵馬監押專管

勾河渠堤堰等事專切管勾學事教閱保甲任諫

按今解州志宋崇甯元年追封關聖爲忠惠公大觀二年加封武安王記所云陰相朝廷累加封爵者指此又宋史地理志解州爲防禦州屬縣三聞喜爲望太平竇宇記云中條山在解縣南三十里其山西連華嶽東接太行又稷下在解縣東北六十七里引左傳杜預云河東聞喜縣有稷山是也記言中條稷山南北相望土廣民饒最爲繁劇檢史志及竇宇記所書語亦適合又此碑云崇甯初二寇擾民當職者深以爲患弓級董政寶領諸眾僅二十餘年盜賊畏懼崇甯元年至政和七年止十六年此云二十餘年疑二字衍觀是碑所紀崇甯初河陝以東民已不靖大觀二年盜遂紛起此轉補史所不及矣職官志迪功郎舊

官將仕郎承信郎舊官三班借職秉義郎舊官西頭供奉
官宣義郎舊官光祿衛尉將作寺丞碑見通志金石記

應感廟牒

石高二尺六寸八分廣二尺五分二截上截
九行下截五行行字不等行書今在武鄉縣

尚書省牒威勝軍武鄉縣應感廟

禮部狀承都省批送下河東路轉運司奏威勝軍申武鄉
縣三壠山古廟一所側有二龍池祈禱靈應乞敷奏封賜
廟額本司保明是實本部未敢施行更合取自朝廷指揮
伏候指揮

牒奉

勅宜賜應感廟為額牒至准

勅故牒

政和八年二月十六日牒

起復中大夫守左丞王

押

特進少宰

押

按碑列禮部狀承都省批送下河東路轉運司奏威勝軍
申武鄉縣云云伏候指揮牒奉勅宜賜應感廟爲額以此
碑文觀之宋時州軍於轉運司用申文禮部於都省用狀
都省者謂尚書都省元豐改官制以左右僕射左右丞主
之左右司爲都司六部事重者決於都省此唐制而宋因
之者六部二十四子末刻政和八年二月日牒起復中大
夫守左丞王特進少宰按政和八年卽重和元年是年十
一月己酉朔始改元碑立是年二月故仍曰政和宋史宰
輔表重和元年正月庚戌王黼自翰林學士承旨以尚書

左丞起復九月庚寅遷中書侍郎政和七年十一月余深
特進少宰兼中書侍郎宣和元年正月遷太宰然則碑所
列左丞王者王黼特進少宰者余深也政和二年改左右
僕射爲太宰少宰余深爲少宰卽右相牒系尚書都省出
故無門下中書侍郎銜

魏景博磨崖石刻

石高一尺八寸廣四尺六分十
六行行字不等正書今在吉州

使口謨留題

魏伯文景博以漕事按部經南汾寓沼堂愛口口字口口俯
臨清泚前山後溪口口森聳時當暮秋久雨口口氣象蕭酒
有飄然出口之想因與屬官張伋口口杖策登凌翠亭徙倚
久口遍閱磨崖石刻頓忘道路奔走之勞翌日由大壩還井

門政和八年閏九月十日書

政和八年閏九月十五日武節郎兼□□□□□□□□

□□□□□□□□州軍州管勾神□□□□□□□□

管司修監□□□□刊石

景博再至南池少留宣和辛丑閏五月二十一日屬官□

□和同行

按魏伯文名景博宋史無傳據此碑政和八年九月伯文以漕事按部經南汾宣和辛丑閏五月再至南池辛丑爲宣和三年伯文領河東轉運使至是歲已歷四載蒞事甚久又攷李皓所著潛心堂記有云守室荒穢不治余宣和三年春來視郡事急其所先曾未暇及夏五月修撰魏侯伯文以漕計按屬部館於郡齋之新亭一夕雨甚至雷電

走屋中起而曰嘻孰謂二千石之居乎燕處超然殊異所
聞乃捐金四十八萬曰系於公者以次葺之於是先其所
甚支傾剔蠹而舊寢以完民初弗知也據皓所記宣和三
年五月伯文以漕計按部卽此碑所云再至南池之歲葺
一郡守之居捐金至四十八萬而云民初弗知足驗當時
漕儲甚裕而一時豐亨豫大之習啟之自上沿之自下故
糜濫至此由是以觀伯文之爲人殆亦好興作習游豫而
非真能率職者歟宋史職官志熙甯初詔河東河北陝西
漕臣令自辟屬各二員以京朝官曾歷知縣者爲之此碑
前云與屬官張伋闕登凌翠亭後云屬官某同行此屬官
卽用熙甯制所自辟之屬也李記稱修撰魏侯其貼職已
崇所繫殿閣則不可詳矣地理志隰州有大甯縣隸河東

路武節郎從七品舊爲莊宅文思副使政和時易名見文獻通考此碑字多剝落謹辨其可識者碑見寰宇訪碑錄長者龕記

碑高三尺二寸廣一尺七寸八分十二行
行二十四字正書今在壽陽縣方山下寺

予元祐戊辰奉使河東行太原壽陽縣詣方山瞻李長者像至則荒茅蔽嶺數十里前後無人煙有古破殿屋三間長者室三間村僧一名丐食于縣未當在山子於破竹經架中得長者修行決疑論四卷十⑤六相論一卷十二緣生論一卷梵夾如新從此遂頓悟華嚴宗旨邑人以予知其長者也相與勸勉擇集賢嶺下改建今昭化院子去彼三十年有住持僧宗悟來言方山非昔日方山也松柏林木高大茂盛不植而生皆應古記又於長者造論口發見龕基以磚石焚砌前

建軒閣古跡歷然僧徒粥飭不求於外遊八士庶不絕於道
相公開其始悟之先師政成其口願得相公隻字以為法門
之光予曰汝持戒人也必不妄語可自紀其實傳後人政和
戊戌十月望日觀文殿大學士張商英題付宗悟

按金石續編宋政和中方山僧宗悟贊李長者龕張商英
題記悟之先師政卽政和尚見郭瑗書政禪師碑又攷李
長者名通元唐時高行僧事蹟具詳壽陽縣志仙釋門張
商英除河東提點刑獄黃山谷年譜引哲宗實錄在元祐
二年七月與長編所紀悉同東坡編年詩元祐二年次韻
孔常父送張天覺河東提刑有云定向秋山得佳句故關
黃葉滿行輶是其履任必在是年秋冬記言元祐戊辰奉
使河東行太原壽陽縣今攷歷代帝王年表戊辰實爲元

祐三年蓋商英以二年秋赴官三年始出行縣文特就其
至壽陽之歲計之故爲戊辰耳又按長編拾補商英政和
元年罷相除觀文殿大學士知河南府旋落職責授崇信
軍節度副使衡州安置七年十二月癸未乃復觀文殿大
學士此記之作適在復職後故得仍書大學士計自重和
戊戌上溯元祐三年戊辰恰三十年商英此時已爲蔡京
所屏置籍元祐黨中矣政和戊戌卽重和元年是年十一
月始改元刻石者未及追改耳又據金石續編碑尾載有
陳知質篆額范圖焯施石田孝孫立石三條各具階職通
志金石記亦載陳知質一條後云宣和庚子七月刻與續
錄合今此石無之殆已剝落不可復識矣宋史地理志太
原府屬有壽陽縣爲次畿隸河東路碑見通志金石記

河中龍門縣刻

石二截高四尺七寸八分廣三尺一寸七分上截十八行
行十三字下截二十六行行字不等行書今在河津縣
河中府龍門縣

政和二年二月初三日

尚書省劄子二月初一日奉

手詔

躬攬萬機講求民瘼作新憲度孚于萬邦事之缺者悉已補
完法之弊者隨即更革

熙豐詔令具在

謨訓思與天下共遵

成憲今貨殖通阜商旅貿遷民物安堵邊隅綏靜中外經費
頗亦寬舒持之歲年其効必著尚慮妨功害能之士貪利希

進之徒乘間抵口妄意申陳輕議增損規毀其

成應今日已行

法令三省恪意遵守無容妄有紛更非甚窒礙而輒議改易者以違制論仍令御史臺覺察彈奏

政日准河中府符准提舉學事衙牒准尚口口口符口口

口八年口口口口日

勅中書省臣口口言仰惟

陛下離明乾健

躬撫萬機開公正之路而

誘之使趨閉邪枉之門而

威之使避

大猷

盛德

照臨百官嗚呼偉哉臣伏讀

手詔以謂

熙豐詔令具在

訓謨思與天下共遵

成憲在位之士孰不精白以承

休德臣伏望

聖慈令監司守令刻此

手詔于石置之廳事使朝夕仰觀俯思如瞻

清光而聆

玉音以副

陛下繼述之志不勝幸甚取

進止仍連元錄白六月五日奉

聖旨在京令諸司在外令監司守令並揭于廳事

忠訓郎權縣尉專切管句教閱保甲臣魏建寧

迪功郎主簿專切管句學事教閱保甲臣王大中

迪功郎縣丞管句學事專切教閱保甲臣劉昭

水□郎□解州□勸農公事□□□□專切管句學事

教閱保甲臣謝穆

按此碑爲宋徽宗政和二年二月手詔政和八年中書省
奏請令監司守令刻石揭廳事者碑首載尚書省劄子奉
手詔熙豐詔令具在謨訓思與天下共遵成憲今日已行
法令恪意遵守輒議改易者以違制論攷績資治通鑑政
和元年九月張商英罷相二年二月戊子朔詔蔡京特復

太師三月壬午入見五月己巳落致仕以太師三日一至
都堂議事是則京以二年二月戊子朔召還此詔卽以是
月三日降其時商英甫罷京尚未入國門執政中如何執
中鄭居中皆陰主京者度京旣召還朝議必譁遂聳徽宗
預降此旨以示風嚮又東都事略蔡京傳云紹聖初章惇
復變役法置司講議久不決京謂惇曰取熙豐舊法施行
之爾何以講爲此京一生挾奸營進之大旨手詔所言其
遵熙豐成憲與京前語適合陳桎通鑑續編載商英謂蔡
京雖明紹述但借以劫制人主禁錮士大夫耳可謂洞中
其隱何鄭輩祖述京志載其語於詔旨中明以箝天下之
口而實用祖訓劫徽宗小人朋比之私其患至此可勝慨
哉政和八年卽重和元年

是年十一月改元

是年六月以前在中

書者余深爲少宰兼中書侍郎白時中爲中書侍郎素皆
附和京議遂又特造刻石之舉猶何鄭志耳又奏中所謂
開公正之路誘之使趨者指置辟雍外學及令天下郡縣
悉仿三舍攷選諸事而言閔邪枉之門威之使避者指竄
逐元祐諸臣立黨人碑籍上書邪等諸事而言也宋史東
都事略及長編拾補均不載此詔賴石刻具存猶可攷見
僉王亂政之大略有裨於史良非淺鮮文獻通攷提舉學
事司掌一路州縣學政崇甯年置宣和三年罷通鑑長編
景德三年詔諸道知州知軍通判等並兼管勸農事龍門
縣隸河中府見宋史地理志

勅賜神居洞崇道廟額記

碑高五尺二寸廣二尺六寸四截刻行不
一字亦不一字徑入分正書今在臨汾縣

尚書省牒平陽府臨汾縣神居洞

平陽府奏本府臨汾縣姑射山姑射洞離洞二十里有廟名姑射神人廟謹按南華真經云藐姑射之山有神人居焉等及檢照本府臨汾縣本府圖經云姑射山在縣西一十八里姑射廟在縣西南二十五里唐武德元年置卽不載古洞事跡本府遂下臨汾縣勘會到本縣姑射山巖下有古大洞一所裏有舊塑神人景成先生洪涯先生等像有小殿一所內有

玉皇真官真人玉童玉女等聖像并有皇甫靖法師留下上清法錄見今有道民看管洞西有龍堂一所道堂二所內亦有羽流居住未有名額伏望特賜名額伏候

勅旨

姑射洞

牒奉

勅宜賜神居洞為額牒至准

勅故牒

政和八年閏九月十六日牒

中大夫守右丞范

中大夫守左丞馮

少保少宰

太師魯國公

在第一截

尚書省牒平陽府臨汾縣崇道廟

平陽府奏本府臨汾縣姑射山姑射洞離洞二十里有廟名姑射神人廟謹按南華真經云藐姑射之山有神人居焉等

及檢照本府臨汾縣圖經云姑射山在縣西一十八里姑射廟在縣西南二十五里唐武德元年置即不載古洞事跡本府遂下臨汾縣勘會到本縣姑射山巖下有古大洞一所裏有舊塑神人景成先生洪涯先生等像有小殿一所內有玉皇真官真人玉童玉女等聖像并有皇甫靖法師留下上清法籙見今有道民看管洞西有龍堂一所道堂二所內亦有羽流居住未有名額伏望特賜名額伏候勅旨

姑射神人廟

牒奉

勅宜賜崇道廟為額牒至准

勅故牒

政和八年閏九月十六日牒

中大夫守右丞范

中大夫守左丞馮

少保少宰

太師魯國公

在第二截

神居洞

維宣和元年歲次己亥三月丁未朔二十一日丁卯朝散大夫直龍圖閣權知平陽軍府管勾神霄玉清萬壽宮管勾學事錢蓋謹遣承務郎知平陽府臨汾縣事王伸敢昭告于神居洞蘋姑射之山有神人居焉肌膚若冰雪綽約若處子自帝堯往見四子黃帝問道於務成之後神人雖不可得而見之然有遺洞存焉窈然空然世謂神人所居者在是而不

知平陽一境陰陽常調風雨常均字育常時年穀常豐民無
天閼物無疵癘皆賴神人之化而致然也茲被

湛恩昭錫洞號豈獨四方萬里之遠皆識神人之居又共慶
神人之化與日月爭光而無極也尚

饗

崇道廟

維宣和元年歲次己亥三月丁未朔二十一日丁卯朝散大
夫直龍圖閣權知平陽軍府管勾神霄玉清萬壽宮管勾學
事錢蓋謹遣承務郎知平陽府臨汾縣事王伸敢昭告于
崇道廟神昔堯治天下之民平海內之政往見四子於蘋姑
射之山黃帝枉駕遊姑射之山問道於務成子蓋姑射實先
聖問道之所也廟像之設久矣而名無以稱焉

今天子執古之道以御今有握圖御極翁張闔散興帝堯之治無異道故錫廟號曰崇道所以示道之所在

聖人尊之之意也消日之良謹以

賜額揭示於廟神其鑒之尚

饗

在第三截

距城之西十八里有山曰姑射南華真經曰謂藐姑射之山有神人居焉者是也口有大洞乃神之居東南有舊廟乃神之像事跡彰彰尤可注意而前此守邦者往往心畏簡書曰亂朱墨於古聖跡非惟不知亦所不暇因使洞蔽荆榛廟穿風雨而神失所安人不知肅良可慨己政和丁酉今 龍圖閣錢公來偃是藩政平訟口吏畏民服暇日既多惟古是好迺按臨汾圖經得姑射神人之事稽考採摭抗章于

朝以丐名額

天子嘉其請

詔賜洞曰神居廟曰崇道旣遣官書而揭之然曰稚老聳觀
遠近奔走且知平陽之有姑射而姑射之有神人也抑嘗原
事之廢興雖因乎人固有人力之所不能及者一係乎世之
如何爾昔堯嘗往見四子於姑射之山當是時也洞之與廟
為如何哉自時厥後寥寥數千百載而褒崇之禮未加焉逮
我

聖天子嗣位仁如天而智如神禮樂彰而法度著以今準古
運適符堯此洞此廟所以復興於今日不然歲在壬辰何以
先獲

天正堯瑞之石於是山之□歟宣和元年三月二十一日承

務郎知臨汾縣事王伸立石朝奉郎知臨汾縣丞趙不約書
江東散民吉志模

此神居洞崇道廟賜額勅并祭文及記分四截刻首截賜
神居洞牒二截賜崇道廟牒三截祭文二四截王伸記趙
不約正書姑射山隋地理志臨汾縣有姑射山寰宇記臨
汾縣有石孔山九孔相通深不能窮新志姑射山在縣西
三十五里卽古石孔山也上有姑射蓮花二洞其山南跨
襄陵太平二縣界莊子云藐姑射之山神人居焉又云堯
見四子於藐姑之山汾水之陽後世立祠卽本於此姑射
神廟元和志武德元年勅置均與碑合景成先生一統志
云景成先生清奇契道隱居臨汾姑射洞功成升翥遺蛻
至今尚存洪厓子神山人名居敬年四十辭家入山訪道

遇山人引見景成子得姑射洞居焉能變化出入神異明
宗召對稱旨賜爵不受歸假葬衣冠脫然而去皇甫靖臨
汾人母武氏夢神人食以桃已有娠而生稍長有方外志
後謁劉真人示以神用觸石如入虛游空如履地變化莫
知紀極政和八年走三山寶籙壇前得三洞真篇暨法衣
一襲而歸曰吾夙志酬矣數日而逝

重修湯王殿記

碑高一尺四寸八分廣一尺三寸八分
十四行行十六字正書今在鳳臺縣

重修湯王殿宇記

大陽 成湯殿宇自乾德伍年我祖劉公之所建也寥寥數
百載風雨浸壞神罔攸寧泳等念神儀之無依恤祀事之靡
嚴遂命工匠重加修崇俾功鳩材鼎新締構易月告成樂櫺

聳勢參差排日月之光薨桷凌虛炳煥奪雲霞之麗於是
神赫威靈變化龍形以示人人心嚴肅祀事彌勤旣殫基構
之制當盡揚功之美恐歲月遄邁罔記其由因以刻石昭示
無窮時宣和元年歲次己亥九月十一日彭城劉泳記
維□宋淵霍立閭立元安孫福劉泳劉宇韓□韓開

木匠王立段剛

瓦匠趙崇趙堅

刻石馮仙□

按鳳臺縣志湯王廟城外數十處其最著者大陽鎮廟有
宋進士劉泳石刻按元皇慶年間大旱詔天下立成湯廟
隨時祈禱而澤州多山磽确易旱立祠獨衆論者以爲始
於元時然宋以前已有專祠固不自元始禱雨析城之說

訛傳已久則桑林之說亦姑存其舊云今碑文首有大陽成湯殿宇乾德五年我祖劉公之所建文則大陽成湯殿立於乾德此宋以前已有廟之證未有宣和元年彭城劉泳記縣志劉泳宋宣和中進士通志府廳州縣考鳳臺縣西北建興鄉大陽鎮五十里縣志建興鄉有大陽都大陽里碑見通志金石記

勅賜應潤廟記

碑連額高三尺六寸廣一尺七寸十八行行三十二字正書額題六字篆書今在平遙縣

勅賜應潤廟記

并汾古良郡也惟平陶介於二大國之間又號為劇邑邑之南五十里有山焉名曰超山勢高且厚下視邑城山之巖有泉出焉源雖微挹嘗其味清涼而滑甘耆老相傳歲遇旱禱

於茲未嘗不應彥和試吏茲邑連二歲春夏旱率三禱皆應如響泉之旁雖舊有祠而圯壞不修榛莽不除因喻所居之民完而葺之民自赴功不日而成廟宇旣崇復思名號不立非所以盡報神之道且自古有功德於民者皆載在祀典故因功德以立名號所以報神於無窮也彥和具以事狀白郡守前後凡再請皆齟齬不克行及周侯領是邦也父母其民民之所欲無不從之於是彥和再狀其事于周侯卽請於朝通錫以應潤名廟嘗考易之繫辭曰雨而潤之書之洪範曰水曰潤下茲山之泉能出雲為雨有雩必應是以得斯名而有以祀其功也今

聖天子道格皇天德被黎庶曰雨而雨曰暘而暘年穀屢登海內豐富至矣然猶以道寧神懷柔之禮無不備盡故山川

鬼神亦莫不寧非特寧處而已又能受職効靈以濟萬物豈
非懷柔之効歟號稱既降周侯復作為祝文遣彥和卜
日齋戒祭告于祠下是日闔境之內老幼畢至莫不歡呼
鼓舞咨嗟大息謂非我侯不能克成乃事咸願紀其歲月
俾後來者知我侯之惠愛及民德無愧於神而神之
食於斯民永永無窮也功無愧於祀典云

宣和元年十二月初十日

宣教郎知汾州平遙縣管句學事余彥和記

太學內舍生龍澤書丹

宣教郎知汾州西河縣丞管句學事王舜俞篆額

太學免解內舍生郭慥立石

按碑言平陶南五十里有山曰超山山巖有泉泉旁有祠

圯壤不修喻所居民完而葺之復思名號不立再狀其事
於周侯請於朝以應潤名廟平遙縣志宣和元年勅賜應
潤廟記在廟內宣教郎知汾州平遙縣管句學事余彥和
記太學內舍生龍澤書字體方整可觀按卽此碑又超山
應潤神祝文在廟宣和元年奉訓大夫周煒遣余彥和致
祭然則此碑所稱周侯者卽周煒以彥和請錫名額故卽
遣其致祭也張標超山祝文跋太守周公守郡之首年朝
廷以本鄒超山神靈應顯著乃賜廟額旣頒
太守親出祭文俾邑長余碑末題宣和元年十二月初十
公往告焉合之此碑益備日宣教郎知汾州平遙縣管句學事余彥和記太學內舍
生龍澤書丹宣教郎知汾州西河縣丞管句學事王舜俞
篆額太學免解內舍生郭慥立石按書撰人與志所題同
志未言篆額立石人此又多舜俞慥舜俞及彥和均見志

一爲縣令一爲丞與碑合但未及在任年月以碑連二歲
攷之則彥和固以重和年莅任者又校續通鑑諸書崇寧
元年八月甲戌詔天下興學貢士建外學於國南蔡京請
天下州縣並置學州置教授二員縣置小學縣學生選考
升諸州學州學生每三年貢太學至則附試別立號考分
三等入上等補上舍入中等補下等上舍入下等補內舍
餘居外舍諸州軍解額各以三分之一充貢士州給常平
或係省田宅充養士費縣用地利所出及非係省錢凡州
縣學生曾經公私試者復其身如有孝悌睦婣任恤中和
若行能尤異為鄉里所推者縣上之州免試入學州守貳
及教授詢審無謬卽保任入貢不實者坐罪京又請外學
以待州縣學之貢士乃詔卽京城南門外相地營建外圓

內方爲屋千百七十二楹是爲辟雍太學專處上舍生內舍生而外學則處外舍生初貢至皆入外學經試補入上舍內舍始得進處太學太學外舍亦令出居外學其敕令格式悉用太學見制於是上舍至二百人內舍六百人外舍三千人凡州學上舍生升舍以其秋卽貢入辟雍長吏集闡郡官及提學官具宴設以禮敦遣限歲終卽集闕下自川廣福建入貢者續其路食以學錢給之奏入詔悉如其法施行此碑所題太學內舍生太學免解內舍生是也又政和三年四月甲申宣義郎黃冠言欲令天下士自鄉而升之縣學自縣學而升之州學通謂之選士其自稱則曰外舍生才之向成升於內舍則謂之俊士自稱內舍生從之亦見諸書可與此碑相參碑見通志金石記

超山應潤廟祝文

碑高一尺五寸四分廣二尺一寸二
十九行行二十字正書今在平通縣

超山神祝文

維宣和元年歲次己亥十二月癸酉朔初十日壬午中奉大
夫知汾州軍州管勾 神霄玉清萬壽宮管勾學事兼管内
勸農使兼點檢牧馬事借紫金魚袋周煒謹以清酌庶羞之
奠敢昭告于

應潤之神惟

神惠澤一方民蒙其福祁聞于

朝以彰

休德

錫以應潤

顯揚厥功煒職守茲土獲

庇良厚謹遣宣敎郎知平遙縣事余彥和消辰致禮明告于
神伏惟

降監尚饗

太守周公治郡之首年

朝廷以本郡超山

神靈應頗著乃賜

廟額然廟額旣頒又

太守周公親出祭文俾 邑長余公往告馬標忝

周公門下之屬僚也懼斯文泯缺無以流播

盛美爰刻堅珉用傳永久宣和二年三月 日立石

忠翊郎權縣尉趙安平

迪功郎權主簿管句學事張公厚

宣教郎知縣丞管句學事張標

宣教郎知縣事管句學事余彥和

本縣郭珣刊

按碑爲知汾州軍州周煒遣知平遙縣事余彥和祭超山
神祝文知縣丞張標跋後刻諸石平遙縣志宋超山應潤
神祝文在廟宣和元年奉訓大夫周煒遣余彥和致祭刻
一方碣字體雅媚又藝文有張標祝文跋然則縣志卽本
是碑也今刻本悉與志同又應潤廟記余彥和撰蓋彥和
禱雨超山有應請周公聞諸朝勅賜名額周因遣其致祭
以廟記及是碑合證其說均同又碑後題銜有忠翊郎權
縣尉趙安平迪功郎權主簿管句學事張公厚宣教郎知

縣丞管句學事張標宣教郎知縣事管句學事余彥和題
街諸人與縣志均合惟安平志作典史蓋典史與縣尉本
可通也又勅賜超山應潤廟牒碑亦在廟宋宣和元年立
然則跋語所謂賜名額者卽係此牒皆可互證碑見通志
金石記

超山應潤廟勅

碑連額高五尺四寸六分廣一尺八寸二分上截五行中
截三行行字不等行書又上截旁刻七行行十三字下截
二十六行行十八字額題
六字均正書今在平遙縣

尚書省牒汾州平遙縣應潤廟

禮部狀承都省批送下河東路轉運司奏據汾州申平遙
縣申本縣超山神祠凡遇旱求祈有應乞敷奏取
旨賜額施行保明是實本司保明是實尋取會到太常寺

狀依條合賜額本部欲依太常寺狀內事理施行更合取自朝廷指揮申聞事

牒奉

勅宜賜應潤廟為額牒至准

勅故牒

宣和元年十月二十五日牒

通議大夫守右丞張

特進少宰

押

少保大宰

押

超山應潤之神姓氏族系經傳蓋無所攷觀

明靈顯著黎庶受賜則旄倪所共聞殆有不可揜者賜雨愆期賴之尤急故前此水旱邑長吏未嘗不禱禱之亦未嘗不

應然封爵廟號則皆倖德不暇睥睨而莫克有請豈天下之事固待人而後興耶我知縣奉議余公好賢樂士貴老慈幼吏畏其威民懷其德而又丞佐之官亦名世士故聲弦製錦推有古人之譽會天慙為鰲凡三謁祠下風馬雲車咸應如響由是遂狀厥事次第而請于朝事下太常勅以應潤揭其廟俾血食茲土焉若封爵廟號之禮雖所未及固自有後先殆不容於諛諛也抑嘗聞在禮有之曰能禦大菑則祀之在傳有之曰有功於民則祀之惟神叱吒雲雷呼吸霜露膏潤嘉生鎮安斯土則其靈異載在祀典蓋亦無愧左氏春秋曰神所馮依將在德矣應潤之神若響若荅有祈必應固神之靈然亦宰是邑者德為可馮依故歟噫後之繼踵而雩者宜亦鑒於斯焉汾陽郭慥序

忠訓郎權縣尉劉扶

廸功郎權主簿張公厚

保義郎監酒稅趙洪

保義郎巡私監張袞

宣敎郎知縣丞管句學事張標

宣敎郎知縣事管句學事余彥和

宣和二年九月初一日貢士趙唐卿立石

郭珣刊

按山西通志超山神祠在平遙縣東山有井池為禱雨取水處宋宣和元年縣令余彥和狀聞敕賜廟額應潤侯彥和撰記按此碑卽刻賜廟額之牒碑云禮部狀承都省批送下河東轉運司奏據汾州申平遙縣申本縣超山祠凡

遇旱求祈有應乞敷奏取旨云云方輿紀要汾州府平遙縣超山縣東南四十里一名過山又牒奉敕宜賜應潤廟爲額准敕故牒與通志賜額應潤合末刻宣和元年十月二十五日牒通議大夫守右丞張特進少宰少保太宰以宋史考之宣和元年三月己未翰林學士張邦昌爲右丞是年正月戊午王黼爲特進少宰余深爲太宰又重和元年七月壬午余深爲少保皆與牒尾官合碑末刻汾陽郭慥序所題官有忠訓郎權縣尉劉扶迪功郎權主簿張公厚保義郎監酒稅趙洪保義郎巡私鹽張袞宣教郎知縣丞管勾學事張標宣教郎知縣事管勾學事余彥和宣和二年九月初一日貢士趙唐卿立石按公厚標彥和又見宣和二年超山神祝文碑所題階與官並同碑見通志金

石記

山右石刻叢編卷十七